

Na osnovu čl. 182. stav (11), 183. stav (4) i 248. Zakona o bankama ("Službene novine Federacije BiH," broj: 27/17), čl. 5. stav (1) tačka h) i 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17) i člana 12. stav (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj: 03/18), Upravni odbor Agencije za bankarstvo Federacije Bosne i Hercegovine, na sjednici održanoj dana 29.03.2018.godine donosi

**ODLUKU**  
**O PODACIMA I INFORMACIJAMA KOJE BANKA DOSTAVLJA**  
**AGENCIJI ZA BANKARSTVO FEDERACIJE BOSNE I HERCEGOVINE ZA**  
**POTREBE IZRADA I AŽURIRANJA PLANA RESTRUKTURIRANJA BANKE**

**Član 1.**

**Predmet odluke**

Ovom odlukom se propisuju podaci i informacije koje su banke dužne dostavljati Agenciji za bankarstvo Federacije Bosne i Hercegovine (u daljem tekstu Agencija) u svrhu izrade i ažuriranja plana restrukturiranja banke, kao i način i rokovi dostavljanja.

**Član 2.**

**Subjekti primjene**

Ova odluka primjenjuje se na:

- a) banke sa sjedištem u Federaciji Bosne i Hercegovine kojima je Agencija izdala bankarsku dozvolu i
- b) bankarsku grupu (u daljem tekstu: grupa) koja je predmet kontrole Agencije na konsolidovanoj osnovi.

**Član 3.**

**Vrste izvještaja**

- (1) Banka je dužna, u svrhu izrade i ažuriranja planova restrukturiranja, Agenciji dostavljati sljedeće izvještaje na:
  - a) Obrascu POL - Podatke o licima odgovornim za obezbjeđivanje podataka i informacija za plan restrukturiranja;
  - b) Obrascu PAO - Bilansne pozicije imovine i obaveza i vanbilansne stavke povezane sa ključnim funkcijama i ključnim poslovnim aktivnostima;
  - c) Obrascu PSP - Učešće u platnim sistemima i sistemima za poravnanje finansijskih instrumenata;
  - d) Obrascu KSK - Ključne softverske komponente informacionog sistema potrebne za provođenje ključnih funkcija i ključnih poslovnih aktivnosti;
  - e) Obrascu ISO - Instrumente kapitala i subordinisane obaveze banke;
  - f) Obrascu POB - Prihvatljive obaveze banke;
  - g) Obrascu POB-ROK - Prihvatljive obaveze banke prema preostalom roku dospjeća;
  - h) Obrascu OOB - Obaveze banke čije je ispunjenje obezbjeđeno založnim pravom, sredstvom finansijskog obezbjeđenja ili drugim srodnim pravom;
  - i) Obrascu SPG - Kvalifikovane prihvatljive obaveze na koje se primjenjuje strano pravo i koje su obezbjeđene garancijom Federacije Bosne i Hercegovine;
  - j) Obrascu KPO - Strukturu kvalifikovanih prihvatljivih obaveza;
  - k) Obrascu MKO - Obračun minimalnih zahtjeva za kapitalom i prihvatljivim obavezama;
  - l) Obrascu PMP - Međusobne povezanosti.

- (2) Direktor Agencije će u roku od 60 (šezdeset) dana od dana stupanja na snagu ove odluke donijeti Uputstvo o načinu sačinjavanja izvještaja koje banke dostavljaju za potrebe izrade plana restrukturiranja banke kojim će se propisati način popunjavanja obrazaca i forma izvještajnih obrazaca.

#### **Član 4.**

##### **Izvještavanje bankarske grupe**

Nadređena banka u bankarskoj grupi ili banka sa sjedištem u Federaciji Bosne i Hercegovine koja je pod kontrolom nadređenog holdinga ili nadređenog matičnog društva čiji nadzor na konsolidovanoj osnovi vrši Agencija (u daljem tekstu: nadređena banka), dužna je da Agenciji za potrebe izrade i ažuriranja plana restrukturiranja bankarske grupe dostavlja izvještaje na obrascima iz člana 3. stav (1) tačke a), b), c), d), f), i), j), k) i l) ove odluke, kao i izvještaj o ukupnim kapitalnim zahtjevima i stopi regulatornog kapitala podređenog društva sa sjedištem izvan Federacije Bosne i Hercegovine, na Obrascu SRK - PDB.

#### **Član 5.**

##### **Rokovi izvještavanja**

- (1) Banka je dužna izvještaje iz člana 3. stav (1) ove odluke dostavljati Agenciji polugodišnje, i to:
- a) izvještaje sa stanjem na dan 30. juni tekuće godine - do 31. avgusta te godine;
  - b) izvještaje sa stanjem na dan 31. decembar tekuće godine - do 31. marta naredne godine.
- (2) Nadređena banka dužna je da izvještaje iz člana 4. ove odluke dostavlja Agenciji polugodišnje, i to:
- a) izvještaje sa stanjem na dan 30. juni tekuće godine - do 30. septembra te godine;
  - b) izvještaje sa stanjem na dan 31. decembar tekuće godine - do 31. maja naredne godine.
- (3) U svrhu ažuriranja plana restrukturiranja, Agencija može zahtjevati od banke ili bankarske grupe da izvještaje iz člana 3. stav (1) i člana 4. ove odluke dostavlja i na drugi finansijski datum i u roku koji Agencija naknadno odredi u zahtjevu.

#### **Član 6.**

##### **Dodatno izvještavanje**

- (1) Agencija, pored podataka i informacija iz člana 3. stav (1) i člana 4. ove odluke, može zahtijevati dostavu dodatnih informacija i podataka.
- (2) U slučaju dostavljanja podataka i informacija iz stava (1) ovoga člana Agencija će propisati rokove i formu dostavljanja traženih podataka.

#### **Član 7.**

##### **Elektronska dostava izvještaja**

Oblik i način elektronske dostave izvještaja iz ove odluke utvrđuje Agencija.

#### **Član 8.**

##### **Prelazne odredbe**

Prvi izvještaji u skladu sa odredbama ove odluke dostavljaju se, na finansijski datum 31.12.2017.godine, a najkasnije do 30.09.2018.godine.

#### **Član 9.**

##### **Stupanje na snagu**

Ova odluka stupa na snagu osmog dana od dana objavljivanja u „Službenim novinama Federacije BiH“.

**Broj: U.O.-18-07/18**  
**Sarajevo, 29.03.2018. godine**

**PREDSJEDNICA**  
**UPRAVNOG ODBORA**

**mr. sc. Ljerka Marić, dipl.ecc. s.r.**